

কু'পরা লামহান

The Waste Land
T.S. Eliot



দিল্‌স্ লক্ষ্মীন্দ্র সিংহ

কু'পরা লামহান

দিল্‌স লক্ষীন্দ্র সিংহ

Ku'pora Lamhan :

A translation of the modern epic in English, 'The Waste Land', by Nobel laureate Tomas Stearns Eliot. Translated in Bishnupriya Manipuri by Dils Lakshmindra Sinha.

® Copy right reserved by translator

Published on : Cherou/Bishu, 14th April, 2016

Published by : Anita Sinha, on behalf of
Bishnupriya Manipuri Writers' Forum,
Brajakumar Leiki, Jagannath Colony,
P.O. Udayan Bihar, Satgaon, Guwahati-71
(M - 99578-14881)

Email : nungkoopigmail.com

Marketed by : M/s Sararel Publishers, Guwahati.

Price : ₹ 50/- only

উৎসর্গ

অধ্যাপক স্বর্গীয় কমলাকান্ত সিংহ গিরক
বার
অধ্যাপক স্বর্গীয় কোকিলসেনা সিংহ গিরক
দ্বয়গির নিঙে
লেরিক এহান

কাৎকরানি অইল।



মুখপাতে

মি ইংরাজী সাহিত্যল বিএ পাকরতে আধুনিক কাব্য জগতর মহাকবি টি. এস. এলিয়টর লগে মর পইলাকার উনাউনি। পাঠ্যক্রমে আসিল গিরকর 'প্রফ্রকর প্রেমর এলাহান' (The Love Song of J. Alfred Prufrock)। পাকরতেই গিরকর রচনাভংগী হানে মরে মৌকরল। এসাদে বুদ্ধিদীপ্ত, লু ভাব-ব্যঞ্জনা মি আগেদে নাঙসু বুলিয়া মনে নাইল। হবাই হাবিতা হারনাপেয়াও মি কিসাদে আকর্ষণ আহান অনুভব করলু। ডিগ্রী পাকরতেই মি অনুবাদ করেসিলু গিরকর Journey of the Magi কবিতাহান -'যাত্রিক' নাঙে। অনুবাদ এহান নিকুলেসিল 'ত্রিপুরা চে' পত্রিকাত। অনুবাদ এহান পাকরিয়া অগ্রজ কবি ব্রজেন্দ্র কুমার সিংহ গিরকে মরে প্রশংসা করেসিল। এমএ পাকরতে এলিয়ট গিরকর বিখ্যাত কাব্যগ্রন্থ 'কু'পরা লামহান' 'The Waste Land'-র লগে উনাউনি। কাব্য এহান পাকরানিরকা মি যেমন জিৎতায়া আসিলু পারা। মনে অইল এহান নাপাকরলে জীবন এহান সার্থক অয়া না উঠলইস। উবাকাই মি পরিকল্পনা করলু ইমাঠারে কাব্য এহানর অনুবাদ করানিরকা।

সাহিত্য সাধনারকা আউরি সময়র প্রয়োজন অর। মি অনুবাদর পরিকল্পনা করিয়াউ মর চাকুরির গই, সংসারর গই বার সাংগঠনিক দায় দায়িত্বর সালে অনুবাদর কাম এহানাং আগুবা নুবারিয়া আসিলু। পিসেদে মি চাকুরির ক্ষেত্রে প্রমোশন লয়া গেলুগা আইজল শহরে। এহানেই মর সাহিত্য চর্চার উপযুক্ত ফামহান আসিল। এ শহরে পাচ বসর থাইতে সৃষ্টি করেসিলু 'মালতী-রাহাল' কাব্য, গ্রীক ট্রেজেডি নাটক 'আন্তিগোনে' বার 'The Waste Land'-র অনুবাদ। The Waste Land-র অনুবাদ এহান 'নুয়া এলা' পত্রিকাত 'কু'পরা মাটি' নাঙে ধারাবাহিক ভাবে নিকুলেসিল। অনুবাদ এহান 'নুয়া এলা'র 'মে-জুন', ১৯৯৭-এস্ত মার্চ-এপ্রিল' ১৯৯৮ খ্রী. পেয়া পাচহান সংখ্যাত নিকুলেসিল। এহানরে থৌতাল দেসিল নুয়া এলার অলিখিত সম্পাদক তথা স্বত্বাধীকারী কবি চন্দ্রকান্ত সিংহ গিরকে। উতার গজে মর অনুবাদ এহানর প্রশংসা করিয়া মতামত ব্যক্ত করেসিলা সাহিত্যবোদ্ধা অধ্যাপক কমলাকান্ত সিংহ বার অধ্যাপক কোকিলসেনা সিংহ গিরক দ্বিয়গিয়ে। মি গিরক দ্বিয়গি জিৎতায়া থাইতে লেরিক এহান নিকালানি মনেয়াউ নুরারেসু। উহানর পস্তানি আহান থাইল মরাং। তানু হাবিহানরে মি শ্রদ্ধাল নিংশিং অউরি।

নাংহান আগেদে দেসিলু -‘কু’পরা মাটি’। কিন্তু উহানে মূল ইংরাজী নাং উহানর ব্যঞ্জনাহান বিশেষভাবে ‘ফিসার-কিং’ বা মৎস্যরাজর ‘পতিত রাজ্য’ বা The Waste Land -র ধারণাহান মনহানাত নানের বুলিয়া নিংকরুরি। উহানল ‘মাটি’র ফামে ‘লামহান’ রাহিগ য়ৌকরে দিলু - ‘কু’পরা লামহান’ এহানেই উপযুক্ত নিংকরুরি।

অনুবাদ এহান করানি উদ্দেশ্য আহান অইলতাই এলিয়ট গিরকরে সম্মান আহান জানানি। অনুবাদ এহানরে মূল গ্রন্থহানর ‘ফার্স্ট-হ্যাণ্ড-বুক’ হান নিংকরানিয়ে হবা অইতই। এলিয়টর বিস্তৃত জ্ঞানর মিঙালহান, তার বুদ্ধিদীপ্ত ভাষার অদ্ভুত বার আকর্ষণীয় প্রয়োগ এ অনুবাদে পানা ছিলইতই। তেবউ পাঠকরাং এ মূল কাব্যহানর প্রতি খানিধারা অইলেউ অনুরাগ বার আকর্ষণ আহান সৃষ্টি করে পারতই নিংকরিয়া এরে অনুবাদ কর্ম এহান লেরিকহানর আকারে শাতকরে দেনার চৌরাং আতে নিলুগা। উতার গজে কাব্যহানর বিষয়বস্তুর মূল পটভূমিকা উহানি আঠৈপা করে মাতে দিয়া জটিল কাব্য এহান হারপানি, উপনির হংনা আহান করে দিলু। এলিয়টে নিজেই বিভিন্ন লেরিকর রেফারেন্স উতা তার লেরিকহানর পিঠিয়েদে আঠৈপা করে য়ৌকরে দেসিল। আশা করুরি ভূমিকাত য়ৌকরে দেসু আঠৈপা কথাহানিয়ে কাব্যহান হারপানি বা উপনিত পাংলাক করতই।

লেরিক এহান ফঙনির মাতামে নিংশিং অউরি কবি সমরজির দা, অনুকুল দা, কবি মারুপ দিল্‌স্ দেবজ্যোতি বার সুধন্য সিংহ গাসিরে। আমেরিকা প্রবাসী উত্তম সিংহ, সুবর্ণা সিংহ; পৌরি সম্পাদক সুশীল কুমার সিংহ, সুলেখক অসীম কুমার সিংহ, কবি নাট্যকার শুভাশীষ সিংহ প্রমুখ সাহিত্য-রসিক গিরিগিথানীর খৌতাল পাছরে নারুরি। সহ-ধর্মীনি শ্রীমতি অনিতা সিংহ বার মর জিলক অনিন্দিতারে থাকাং জানাউরি। আঠৈপা থাকাং জানাউরি প্রেছর স্বত্বাধীকারী তথা কবি সমর সিংহ বার সহ-ধর্মীনি মঞ্জু সিংহরে।

দিল্‌স্ লক্ষ্মীন্দ্র সিংহ।

গুৱাহাটী, ০৩-০৪-২০১৬ খ্রী.

আঠৈপা কথাহানি

দি বেইষ্টল্যাণ্ড (The Waste Land) : আধুনিক সভ্যতার
ব্যর্থতার চুম্‌কার লল আগ—

বিংশ শতিকাৰ বহুচৰ্চিত কাব্যগ্রন্থ আহানৰ নাংহান টি. এস. এলিয়টৰ ‘দি বেইষ্টল্যাণ্ড’। ইংৰেজী সাহিত্যৰ বিশ্বব্যাপী চৌহিদ্দাগ হাপদানিৰ গজেউ এ মালেমৰ নানান উন্নত বার অনুন্নত ঠাৰে এ লেৰিক এহানৰ অনুবাদ, এহানৰেল বিতৰ্ক বার আলোচনাৰ অন্ত নেই। ৪০৩-হান পাৰেঙে পুন্নাপ পৰিকল্পনাৰ মাতুঙে আধুনিক মহাকাব্য আহান লেংকরানি এহান আধুনিক কাব্য-জিজ্ঞাসাৰ ফসলহান। প্রখ্যাত কবি, সমালোচক এজ্জরা পাউণ্ডে (Ezra Pound) মাতেসে- “Eliot’s *Waste Land* is I think the justification of the ‘movement,’ of our modern experiment, since 1900,” সমালোচক Pericles Lewis-ৰ মতে - The Waste Land made use of allusion, quotation (in several languages), a variety of verse forms, and a collage of poetic fragments to create the sense of speaking for an entire culture in crisis; it was quickly accepted as the essential statement of that crisis and the epitome of a modernist poem.

মহাকাব্য এহান পাচহান সৰ্গৰ বিতৰে লিংখাত কৰেসে। পাচহান সৰ্গৰ নাং এসাদে - ‘মৃত্যুৰ সৎকাৰ’ (The Burial of the Dead), ‘দাবাখেলা’ (A Game of Chess), ‘অগ্নিবানী’ (The Fire Surmon), ‘সলিল সমাধি’ (Death by Water) বার ‘বজ্র-খল্লিক’ (What the Thunder said)। নংসাং দিন ধৰিয়া কাব্য এহানে

আধুনিক মননশীলতা বার শিল্পর অন্যতম কীর্তিহান সাক্ষা পাঠক বার সমালোচকর সমাদর পেয়া আহের। এহানর আরোপা-কারণহান এলিয়টর জ্ঞান বার অভিজ্ঞতার বিস্তৃত আন্তর্জাতিক পরিধিহান। নাংজাদা সমালোচক আই. এ. রিচার্ডস্ গিরকে কাব্য এহানরে ‘ভাবসংগীত’ (Music of Ideas) নাঙে আখ্যায়িত করেসে।

১৯২১ সনর হম্বুকেদে ডাক্তারর পরামর্শ মতে জিরানির সালে এলিয়ট যেবাকা বসর আহান আসিলগা সুইজারল্যান্ডর লাউসেনর স্বাস্থ্যনিবাস আগত, উবাকা গিরকে ‘দি বেইষ্টল্যান্ড’ করপেখহান হংকরেসিল। এলিয়টর মনহানাত উবাকা সক্রিয় অয়া আসিল প্রথম মহাযুদ্ধর পিসেকার ইউরোপর পুঞ্জাপ ধ্বংসলীলা বার প্রায় দ্বি-লিংশ বসরর নিরবচ্ছিন্ন ইতিহাসরমা মহাযুদ্ধহানে আনেসিল পইলাকার মিমতপা নিরস নিংশিংহান। ১৯২২ সনর অকরাগত এলিয়টে তার অজাগ-সাকপা কবি এজরা পাউণ্ড গিরকরাং তার করপেখ হান দিয়াপেঠেইলে পাউণ্ড গিরকে করপেখ এহানর খেইপক আহান কাপিয়া বেলা দেনার পরামর্শ দেসিল। এ মাতুঙে এলিয়টে নিজে ‘The New English Weekly’ পত্রিকার ১৯৪৯ সনর ২১ অক্টোবরে নিকুলেসিল লেখাহানাত ইকরেসিল। সম্পাদিত অংতাং ‘ক্রাইটেরিয়ন’ (The Criterion) বার ‘ডায়াল’ (Dial) পত্রিকার অক্টোবর বার নভেম্বর সংখ্যাত ‘দি বেইষ্টল্যান্ড’ ছাপেসিল। এপেইং উল্লেখ করানি যাকরের যে পাউণ্ড গিরকে কাপিয়া বেলাসিল অংশ উহানল গিরকর দুহান কবিতা নিকুলিল - ‘জেরনসন’ বার ‘হলো ম্যান’। ‘দি বেইষ্টল্যান্ড’ এহান ১৯২২ খ্রি. লেরিকর আকারে নিকুলানিত যাম হ্রকাং অর বুলিয়া প্রকাশকে মাতানিয়ে এলিয়টে আঠৈপা টোকা আকেইহান যৌকরে দিয়া লেরিকহানর গারিগ ডাঙর করেসিল, যেহান এলিয়টর মৌলিক চিন্তাহান বুলিয়া মাতানি যাকরের। এলিয়টে পাউণ্ড গিরকর নাঙে লেরিকহান কাংকরতেগা মাতেসিল - ‘মহত্বর শিল্পী’ (*il miglior fabbro*)।

উল্লেখ করানি যাকরের ‘দি বেইষ্টল্যান্ড’ ইকরানির আগে বার পিসে এলিয়টে নাংকরা কবতাগমাহি ইকরেসিল। ১৯১৭ খ্রি. প্রকাশ পাসিল তার

নাংকরা কবিতাহান 'প্রফ্রকর প্রেমর এলাহান' (The Love Song of J. Alfred Prufrock) বার 'দি বেইষ্টল্যাণ্ড'র পিসেকার কবিতা 'Ash-Wednesday(1930)' বার 'Four Quartets(1935-42)'। পিসেকার এহানিরে আরাকৌ মহত্বম রচনা বুলিয়া অনেক সমালোচকে মত প্রকাশ করলেউ অধিকাংশ পাঠকরাং 'দি বেইষ্টল্যাণ্ড' নাং এহানে মস্তুর সাদে বহু দশক ধরিয়া আচানকর প্রভাব আহান সিলকরিয়া আহের বার তার বহু বিচিত্র ব্যঞ্জনার পরিসরহান দিনে দিনে সারয়া আহের বুলিয়া মাতলে ঠৈকরে মাতানিহান নাইতই।

পইলা নিকুলেসিল উবাকা 'দি বেইষ্টল্যাণ্ড' কাব্যহানরে সমালোচকে হবা আহিল নাচাসিলা। 'নিউ স্টেটসম্যান' বার 'স্কুটিনী' পত্রিকাত এহানরে 'কতহান কবিতার সমষ্টি মাত্র' বুলিয়া সমালোচনা করেসিলা। 'আমেরিকান পোয়েট্রি' পত্রিকাত সমালোচক লুইস উন্টারয়োরে এহানরে 'সাহিত্যিক মেস্তরীগিরী' (Literary capentry) বার 'পাণ্ডিত্যর নাপালিয়া প্রদর্শন' (pompos parade of erudition) বুলিয়া তাখি করেসিল। বিখ্যাত সমালোচক ই ভি লুকাসে সমালোটনা কবতেগা মাতেসিল যে কবিয়ে জীবনেস্ত নাগই বরং লেরিকেস্ত এহান ইকরানির ঠৌরাং পাসিল। 'টাইমস লিটারারি সাপ্লিমেন্টস'-রমা কবিতা এহানরে মাতেসিলা অন্যর রচনার রসহীন বার রুচিহীন বিকৃতিহান। অন্যান্য সমালোচকেও উসাদে মাতেসিলা যে কবিতা এহান অর্থহীন পাণ্ডিত্যল ভার ফাসে বার কালক্রমে এহান নিজে নিজে পাছরানির গভর্ত মাঙয়া যিতইগা। কিন্তু সময়র লগে লগে কাব্য এহানর তাৎপর্যর দিক উহানি সমালোচকে গ্রহণ করানি অকবলা বার এলিয়টর কাব্যপ্রতিভারে স্বীকৃতি দেনা অকবলা। এফ আর লিভিস, মেথিসন, ক্রিস্ট ব্রুকস্ আদি নাংজাদা সমালোচকে কাব্য এহানর প্রকৃত অর্থ বার বৈশিষ্ট্য উতা তুলিয়া ধরে দিলা। ফলস্বরূপে কাব্য এহান আধুনিক কালর ঘনীভূত মহাকাব্যহান বুলিয়া স্বীকৃত অইল। আধুনিক কালর জটিল জীবনবীক্ষার চিত্র প্রতিফলিত অনাত কাব্য এহান একক বার অদ্বিতীয়, এরে কথা এহান হাবিয়ে স্বীকার করানি অকবলা। ১৯৪৮ খ্রি. য়েবাকা সুইডিস একাডেমীয়ে নবেল পুরস্কার দিলা উবাকা প্রশস্তিপত্রহানাত ইকরেসিলা - 'দি

বেইটল্যাণ্ড’ - এরে নাং এহানর ভয়াবহ তাৎপর্য উহান উবাকাই সা’ সা’ করে নিকুলিয়া আহের যেবাকা কঠিন বার পাণ্ডিত্যপূর্ণ শব্দরীতির রহস্যহান উদ্ঘাটিত অর। বিষম গভীর উচ্চারণর পরাদে অনেক সময় বাস্তব সম্পর্কিত, অনেক সময় পুরাণ সম্পর্কিত যারির পাতাপে আধুনিক সভ্যতার ব্যর্থতা বার রসহীনতা উহান এহানাত চিত্রিত অসে; বার এতাহাবির পারম্পরিক প্রতিফলনর বিচ্ছুরণহানে প্রকাশ পাসে আচানকর সামগ্রিক মিঙাল আহান। কালর দিকেদে ‘দি বেইটল্যাণ্ড’ প্রায় পচিশ বসর আগেকারহান, কিন্তু কাব্য এহানর প্রলয় দর্শনর সার্বজনীনতা যেহান প্রমাণিত অসে, যে সার্বজনীনতা এবাকার পারমাণবিক যুগর প্রেক্ষিতরমা আজিও বাস্তব অয়া বার টাংখেই সেঙয়া আসে।’

অসাধারণ কাব্যগ্রন্থ এহানর বৈশিষ্ট্য উহানি খিয়াল করিল মত। পইলাতে এহানর আচানক সংক্ষিপ্তি, অতি কম কথাল বক্তব্যহান উপস্থাপন করানির রীতিহান। মাতানি যাকরের পুঙ্খাপ কবিতাহানেই ডিগল বক্রোক্তি আহানর সাদে। উহানর লগে আসে সাদৃশ্য বা সমান্তরালতার বেমলবেঠা বার অবৈপা প্রয়োগ, যেহানরেল অতীত বার বর্তমানরে লুরি আকনানল ফুলডালর সাদে কবিয়ে গিথিয়া আনেসে। আধুনিক যুগর শূণ্যগর্ভতা বার কার্য-কারণ সম্বন্ধ সা’সা’ করে তুলিয়া ধরানিরকা প্রাচীন পুরাণ কাহিনী বার কিস্মদন্তী উতার যথাযথ ব্যবহার করেসে। তুলনা বার বৈপরীত্যর পরাদে উন্মোচিত করেসে সুস্থ জীবনবোধর অভাবে সৃষ্টি অসে পরিস্থিতির স্বরূপহান। কাব্য এহানাত নেই কোন অসার উচ্ছ্বাস, যাম সরল সমাধান বার ভাবপ্রবণতা, বরং কাব্যহানর বিভিন্ন পরিবেশর নাটকীয় ঝারিপরি বার বর্ণনার পরাদে উপস্থাপন করানি অসে যুগবেদনার নৈব্যক্তিক আলেখ্য আহান।

এলিয়টে নালুকেয়া মাতেসে যে এরে কাব্য এহানর নাংহান, পরিকল্পনা বার আনুষংগিক প্রতীকর ব্যবহার করতে গিরক Miss Jessie L. Weston-র ‘From Rituals to Romance (Cambridge)’ বার জেমস ফ্রেজারর (James Frazer) ‘দি গোল্ডেন বাও’ (The Golden Bough) নাঙর নৃতাত্ত্বিক গ্রন্থ দ্বিয়হানরাং বিশেষভাবে ঋণী।

‘কু’পরা লামহান’ বা ‘পতিত রাজ্য’র (The Waste Land) পৌরাণিক কাহিনী-সংক্রান্ত পটভূমির উৎসহান এরে লেরিক দ্বিয়হান। বেষ্টনরাংত গ্রহণ করেসে ‘গ্ৰেল’ (Holy Grail) বার ‘মৎস্যরাজ’র (Fisher King) য়ারিহানি। বার ফ্রেজাররাংত লসে শস্য বার উর্বরতা সম্পর্কীয় পৌরাণিক রীতির কথাহানি।

‘হোলী গ্ৰেল’ (Holy Grail) অর্থাৎ ‘পবিত্র পাত্রাধার’র তুলো মধ্যযুগর রোমান্স য়ারি আহানর সম্পর্ক আসে। ইংল্যান্ডর রাজা আর্থার বার তার নাইটবৃন্দরে (বীর যোদ্ধা) কেন্দ্র করিয়া দল আগ য়ারি আসে। ‘পবিত্র পাত্রাধার’ অইলতাই ঔ খুচেই বা পাত্র উগ য়েগ যীশুখৃষ্টই তার লমইলগা খানাহানর সময়ত ব্যবহার করেসিল বার ঔ খুচেই উগত ক্রশবিদ্ধ যীশুর পবিত্র রকত রক্ষা করিয়া থনা অসিল। য়ে বেদীগত খুচেই এগ য়করিয়া থনা অসিল এগর কাদাত থনা অসিল বর্শা আগ য়ে বর্শাগল রোমান সৈন্যই গিঠে গিঠে যীশুর গারিগত রকত জঙাসিলা। এরে জঙা রকত এতা ধরিয়া থসিলা ‘পবিত্র পাত্রাধার’ এগত। মধ্যযুগে এরে খুচেই এগরে মুঙে থয়া ইউরোপে নানানতা য়ারি লেঙসিল বার এসাদে পবিত্র পাত্র এতা প্রতিষ্ঠা করিয়া ফামে ফামে প্রার্থনা গৃহ বা গীর্জা হঙসিল। গীর্জার বেদীত খুচেইগর লগে আসিল বর্শা আকেইগ। এরে খুচেই বার বর্শার য়ারির তুলো আদিম সমাজর উর্বরতা সংক্রান্ত ক্রিয়াকলাপর (ফাটিলিটি কাল্ট) যোগাযোগ আহান বেষ্টনে তার ‘ফ্রম রিচুয়েল টু রোমান্স’ লেরিকহানাত দেখ্বাসে। মধ্যযুগীয় কাহিনীহানাত মাতানি অসিলতাই য়ে উপাসনা গরগত ঔ আসল খুচেই উগ থনা অসিল, উগ সময় আহান কিতারে কিতায়া পেইরাক উপেইঙ নেয় পরিলগা। বহু নাইট বা বীর যুদ্ধা এতাই পাত্র এগ বিসারতেগা নিজর জীবনহান পেয়া বিপন্ন করেসিলা। এরে কথা এচুটিও ঔ কাহিনী উহানাত য়ৌকরানি অসিল য়ে হুদ্যা নিষ্পাপ বীর যোদ্ধাইহে এরে পাত্র এগ সেংক উদ্ধার করে পারতাই। ইংল্যান্ডর রোমান্স কাহিনীত এসাদে নিষ্পাপ বীর যোদ্ধাগ হিসাবে ‘স্যার গালহাড’রে আখ্যায়িত করানি অসিল। ফ্রান্স বার জার্মানির রোমান্স কাহিনীরমা ‘পার্সিফাল’ বা ‘পার্সিভাল’র নাং উল্লেখ

আসিল। জে. সি. বেষ্টনে পাত্ৰ বার বৰ্শাগৰ য়াৱিৰমা আবিষ্কাৰ কৰেসিল
আদিম সমাজৰ উৰ্বৰতা সংক্ৰান্ত ধাৰণা বার যৌন সম্পৰ্ক। পাত্ৰগ বার
বৰ্শাগৰে গিৰকে ক্ৰমে নাৰী বার পুৰুষৰ জননেন্দ্ৰীয়ৰ প্ৰতীক ৰূপল
চিহ্নিত কৰেসে। পিসেদে যীশু খ্ৰীষ্টৰ য়াৱিপৰিৰ তুলো সাময়া পাত্ৰগ বার
বৰ্শাগই ধৰ্মীয় ৰূপ আহানাত পটা খাসে বুলিয়া বেষ্টনে উল্লেখ কৰেসে।

মধ্যযুগৰ এৰে পুৰাণ-কাহিনী এহান হঙয়া আহেসেতা শিৰাপ-গ্ৰস্ত
লাম আহানৰে কেন্দ্ৰ কৰিয়া। ফিসাৰ কিং বা মৎস্যৰাজৰ লামহানৰ
'আপংপা গীৰ্জা' নাঙৰ উপাসনা কেন্দ্ৰ আগত আসল পাত্ৰ উগ লুকেয়া
থনা অসিল। উগ বিসাৰেয়া বীৰ যোদ্ধা পাৰ্চিভাল লগৰ সহযোদ্ধাৰ দল
আহানল মৎস্যৰাজৰ লাম উহানাত গিয়া উপস্থিত অসিলগা। তাঞ্জা
উহানাত মৎস্যৰাজ নুৱাৰায়া সলসিল। তা নুৱাৰা অনিৰ কাৰণহান
অইলতাই - তাৰ সিবেই উতাই উপাসনাগৃহৰ সেবাদাৰী নিঙল উতাৰে
ধৰ্ষণ কৰেসিলা। উহানৰ সালে মৎস্যৰাজ শিৰাপ-গ্ৰস্ত অসিল। ৰাজাগিৰি
নিজে অসিল নিবীৰ্য্য বার অসুস্থ, তাৰ ৰাজ্য উহান অলসিল কু'পৰা বা
পতিত লামহান - 'দি বেইষ্টল্যাণ্ড'-হানাত। উপেইত আসিল দুৰ্ভিক্ষ,
অনাবৃষ্টি, সংক্ৰান্তিৰ সাকতি ছেয়াগ - এৰে মাটি এহান পানি নেয়া হুকানা
বার ৰাঞ্জিৰা; কোনো জীৱ বা গাছ-বিৰুক এপেইত নাডেমৰ বা জৰম নাৰ,
এপেইত জীবনৰ কোনো স্পন্দন নেই, মানব সমাজ পৰিণত অসে
আধ্যাত্মিক মৰুভূমিত। এৰে চিত্ৰ এগ কবি এলিয়টে পাংকাল্লা ভাষা
আহানল উপস্থাপন কৰেসে 'দি বেইষ্টল্যাণ্ড' -

"What are the roots that clutch, what branches grow
Out of this stony rubbish? Son of man,
You cannot say, or guess, for you know only
A heap of broken images, where the sun beats,
And the dead tree gives no shelter, the cricket no relief,
And the dry stone no sound of water."

-- "The Burial of the Dead"

(কিসাদে মারাথাং এতা মাসাচেং কতি?
 কিসাদে ডেঙু থাং ডেমর আয়া হিলর গুরার হাদিত?
 হে টেইপাঙ মানুর পুতকগ,
 কিস্তাউ তি মাতে নারর, উপনিও নারর
 কারণ তি হারপাসত হুদা-
 বাগা প্রতিমার তুমুর, যেপেইত -
 বেলিহানে করের চিক চিক
 মরা গাছে নাদের ঠাং,
 জিনজিনির রৌএ নেই নুংশিহান
 বার হুদা হুকানা হিল, শব্দ নেই পানির।) — ‘মৃতার কবর’।

নুরারাচেলপা অংতালাকতার হাদিতৌ মৎসারাজ আশাবাদী। গিরকে
 খালকবের যে সৈনেই আকদিন নিষ্পাপ বীর যোদ্ধা আগ আয়া ফরৈতই
 তার কু’পরা লামহানাত, যেগই নানা বাধা-বিপত্তি লালয়া আপংপা গীর্জা
 উগত হমেয়া পাত্র-রহস্য উহান ভেদ কবতই। উতার পিসেদে মৎসারাজে
 ‘পুণ্য-স্নান’র পরাদে নুরারাপানিস্ত বালায়া আগেকাব পাংকান্না গারিগ আলথক
 পেইতই। রাজাগ বালাইলে হুকানা লামহানাত লামিয়া আইতই জুবি জুবি বরন
 বার লাম এহানে সেংকরে পেইতই উর্বরতা। এরে বীর যোদ্ধাব কাহিনী এহান
 কবিয়ে যৌকরেসে কাব্যহানর পঞ্চম সর্গত (বজ্র-খল্লিক)।

ফ্রেজারর ‘দি গোল্ডেন বাও’ (The Golden Bough) নাঙর
 নৃতাত্ত্বিক গ্রন্থ উহানাত এলিয়টে লসে আদিম কৃষি-সভ্যতার লগে জড়িত
 ঋতুচক্রর হাদিয়েদে প্রকট অসিল মৃত্যু বার পুনর্জন্ম সম্বন্ধীয় প্রতীক।
 প্রকৃতির ঋতুকালীন পরিবর্তনর হিম্মকে আসে মৃত্যু বার পুনর্জন্মর আদিম
 সমাজর ধারণা। অউ মতে শীতকাল বা জারর পর এহান প্রকৃতির মৃত্যু
 বার বসন্তহান অইলতাই প্রকৃতির পুনর্জন্মহান। জারর পরে মাটির উর্বরতা
 লুপ্ত অর, বার বসন্ত আনার পিসে বাসন্তী-বরন জুরির লগে লগে মাটির
 উর্বরতা সেংকরে আহের, জীবন এহান সেংকরে মাথক লাঙর। আদিম
 সমাজে ঋতুচক্রর এরে পরিবর্তনর লগে কৃষি সম্বন্ধীয় কতহান আচার
 অনুষ্ঠান প্রচলিত আসিল। মিশরে শস্যদেবতা ওরিসিসর খেরর মূর্তি আগ

হংকরিয়া উগর বিতরে শস্যর বীজ বরেয়া মাটিত গাতানি অসিল। অনুষ্ঠান এহানে শস্যদেবতার মরনহান প্রতীকীত করেসিল। কতদিন পিসে মূর্তিগর বিতরে বরেয়া থসিলা বীজ উতা ডেমেয়া মাটি ফারিয়া গজেদে নিকুলিয়া আহেসিল। উহানে প্রতীকীত করেসিল শস্যদেবতার পুনর্জন্মরে। গ্রীস বার অন্যান্য কতহান ইউরোপীয় দেশরমা শস্যদেবতার নাংহান আসিল এডেনিস বার এভিস। কতহান দেশে এডেনিস বার এভিসর খেরর মূর্তি উগ মিশরর সাদে মাটিত গাতাসিলা, কতহান দেশে বার পানিরমা বিসর্জন দেসিলা। হাত দিন লালৈলে পানিত্ত দৌগ সেংকরে টেকাগত কাকরেসিলা। এহানে বুজাসিল শস্যদেবতার পুনর্জন্ম। মানুৰে এলা নাসার কুমেই করিয়া শস্যদেবতার পুনর্জন্মত আনন্দ প্রকাশ করেসিলা। এলিয়টে ‘দি বেইষ্টল্যাণ্ড’ কাব্যহানর ‘মৃত্যুর সংকার ’ বার ‘সলিল সমাধি’ সর্গ দ্বয়হানাত অনুষ্ঠান দ্বয়হানর স্মৃতি যৌকরিয়া আধুনিক জীবনর প্রেক্ষিতে জন্ম বার মৃত্যুর রহস্য ব্যঞ্জিত করেসে।

কাব্য এহান অকরানির আগে এলিয়ট গিরকে ‘এপিগ্রাফ’ বা নীতিবাক্য হিসাবে মুখপাতে সামদেসে ‘সেটিরিকন’ গ্রন্থর উদ্ধৃতি আহান, যেহানর ভাবার্থহান এসাদে - “আকখুরুম মি কিউমির সিবিলারে পিঞ্জরা আগত লটকিয়া থাইতে স্বচক্ষে দেহেসিলু বার যেবাকা মুনিসৌ উতাই আংকরেসিলা - ‘তরতা কিতা লাগেরতা?’ তেই জুরাপ দেসিলী মি মরানি মনাউরি।” এহানর পিঠিত আসে গ্রীক পুরাণর য়ারি আহান। ঔ য়ারিহানে মাতেরতাই ‘সিবিলা’ (Sybil) নাঙর বেয়াপা এতারতা ভবিষ্যতবাণী করানির মাটিক আসিল। উতারমা কিউমির ‘সিবিলা’ এগ হাবিরাংত য়াম নাংফিটেসিলী। তেই গ্রীক দৌগ এপলোর প্রিয়পাত্রীগ আসিলী। এপলো গিরকে তেইরে অমরত্ব দান করেসিল, কিন্তু অনন্ত যৌবন দান নাকরেসিল। তারো সময়র হোতগত তেই আলঠা বুড়িগ অলসিলী, যেহানর সালে তেই মরণহান কামনা করেসিলী। কাব্য এহানাত এরে উদ্ধৃতি এহানর আঁৰেপা ভাবহান অইলতাই এসাদে : এবাকার টেইপাং এহানাত আমি যেসাদে জিংতায়া আসি উহান অইলতাই জিংতা মরার সাদে, হয়তো মরানির বিতরে পেইতাঙাই নিষ্কৃতি। ঔ মরণ উহান

এসাদেহান যেসাদে যীশুখ্রিষ্টই মাতেসিল - 'dying into life'-
'মরানির বিতরেদে নুবা জন্ম আহান'। নির্বানর মাজে মুক্তি।

এসাদে করিয়া দেহিয়ার প্রাচীন উদ্ধৃতি, বাণী বার ঘটনার সাদৃশ্যর
পাংলাকে সভ্যতা বার চেতনার মরণফাং অংতাহান তুলিয়া ধরিয়া
এলিয়টে প্রথম মহাযুদ্ধর পিসেকার জনমানসর বিশেষ 'ন যযৌ ন তস্হৌ'
অংতার বিশেষ লল আগ য়েকরেসে। এহানৌ অস্বীকার করিল উপায়
নেই যে, বিশেষ সময় আহানর পটভূমিত লেংকরানি অইলেউ এরে
কাব্যর বিতরেদে সালসে সার্বজনীনতার খল্লিকগ। কারণ এপেইত যে
পরিস্থিতিহানরে তুলিয়া ধরানি অসে উহান মানব ইতিহাসর হাবি যুগরমাও
এসাদে পরিস্থিতি সৃষ্টি অয়া আহেসে। উহানল প্রখ্যাত সমালোচক হেলেন
গার্ডনারে 'দি রেইষ্টল্যাণ্ড'-র বৈশিষ্ট্যর গজে আলোচনা করতেগা মাতেসে
যে এপেইত যে সংকটর কথা মাতানি অসে, ও সংকট ঐতিহাসিক বার
চিবস্তন চরিত্রর, কোনো বিশেষ কাল আহানাত এহান আবদ্ধ নাগই।

অনেক সমালোচকে 'দি রেইষ্টল্যাণ্ড' কাব্যহানরে নিরাশাবাদী
(pessimistic) বারো শূণ্যতাবাদী (nihilistic) দৃষ্টিভংগীল
লেংকরাহান বুলিয়া মাতেসি যদিও, য়াম্পারা সমালোচকেই এহানর বিতরে
আসে আশাবাদ বার আধ্যাত্মিক প্রতিশ্রুতির উচ খল্লিকগ ধরিয়া এহানর
পারিলমাহি বাখান করেসি। এলিয়টে আশাবাদ বার আধ্যাত্মিক
প্রতিশ্রুতির উচ খল্লিকগ বিসারেয়া পাসে বৈদিক মূলর উপনিষদ-দর্শনর
বিতরে। অবক্ষয়েত্ত পুনরুজ্জীবনর পথে, নুবরাস্ত নিরাময়র পথ চিরকাল
মানুর মুংহানাত মুকিয়া আসে, - বৃহদারণ্যক উপনিষদে প্রজাপতির বজ্র-
খল্লিকগ [Thunder] তারো কাব্যহানর লমনির পাতাপে টাংখেই সেঙয়া
থানাই চিরদিন মানুবে উত্তরণর পথগ দেহা দে। প্রজাপতির তিনহান মন্ত্র -
'দত্ত-দয়ধ্বম-দাম্যত'র বিতরে আসে বজ্রর বাণী। 'দান কর-দয়া কর-
দমন(আত্মদমন) কর' (give, sympathise, control) - বজ্রর এরে
বাণী এহানি পালন করানির মাধ্যমে মানুবে নিজর উত্তরণ ঘটানি পারতারা।
বৃহদারণ্যক উপনিষদর ঝারিহন এসাদে : প্রজাপতি ব্রহ্মারাং শিষ্যত্ব লসিলা
দৌ, হিঞ্চাপা বার টেইপাং মানুবে। বিদ্যা তালকরানি লমৈলে তানু ব্রহ্মা

গিরকরাংত উপদেশ চাইলা যে অর্থপূর্ণ জীবন যাপনরকা তানু কিতা কিতা গুণ অর্জন করানি লাগের। উবাকা প্রজাপতিয়ে তিনখুরুম উচ্চারণ করল - 'দ' (Da)। তানু ছনলা 'দ' শব্দগর তঙাল তঙাল অর্থ তিনহান। মানু এতাই অর্থহান করলা 'দত্ত' অর্থাৎ দান করানি। হিঙ্গাপাই নিংকরলাতাই 'দয়দ্ধম্' অর্থাৎ দয়া করানি। দৌলাশাই হারপেইলাতাই 'দ' অর্থ 'দম্যত' অর্থাৎ নিজরে দমন করানি। উপনিষদর এরে প্রসংগ এহানল এলিয়টে মাতানি মনাসেতা এহান যে 'দত্ত', 'দয়দ্ধম্' বার 'দম্যত' এরে তিনোহান গুণ অর্জন নাকরলে 'কু'পরা লামহান কুনোদিন উর্বর নাইতই অর্থাৎ কুনোদিন মানুরতা আধ্যাত্মিক উৎকর্ষ সাধন সম্ভব নাইতই।

উপনিষদ এতার আনুষ্ঠানিক সমাপ্তিরমা উচ্চারিত অর - 'শান্তিঃ, শান্তিঃ, শান্তিঃ'। এলিয়ট গিরকেউ উপনিষদর অনুকরণে তার 'দি বেইষ্টল্যাণ্ড' কাব্যহান লমকরেসেগা 'শান্তিঃ, শান্তিঃ, শান্তিঃ' উচ্চারণর মাধ্যমে। বেদরমাও এরে 'শান্তিঃ' শব্দ এগর ব্যবহার অসে। যজুর্বেদরমা এগর ব্যবহার কিসাদে অসে উহান চাইক -

'May the sky be peaceful.
May atmosphere be peaceful.
May Earth be peaceful.
May waters be peaceful.
May medicinal herbs be peaceful.
May plants be peaceful.
May all the learned persons be peaceful.
May God and the Vedas be peaceful.
May all the objects be peaceful.
May peace itself be peaceful.
May that peace come unto me.'

(Translated- Devi Chand)

অইলেউ উপনিষদে 'শান্তিঃ, শান্তিঃ, শান্তিঃ' উচ্চারণ করানিরমাও বিশেষ তাৎপর্য আহান ইতু অয়া আসে। স্বামী দয়ানন্দই তার 'সংস্কারবিধি'

নাঙর লেরিকহানর ‘শান্তিপ্রকরণম্’ অধ্যায়হানাত ইকরেসে যে ‘শান্তিঃ শান্তিঃ শান্তিঃ’ উচ্চারণে মনেস্তকুরি হাবি ধরণর অশান্তি, উদ্বেগ বার সন্দেহ দুরেই অয়া মনে প্রশান্তির ভাব আহান জাগিয়া উঠের। মানব জীবনে বাধা-বিঘ্ন লেহাযুগা নেই। উপনিষদ রচনাকার এতাই ঔতা হাবিস্ত তিনহান মূল বিঘ্ন চিহ্নিত করেসি : আধ্যাত্মিক, আধিদৈবিক বার আধিভৌতিক বিঘ্ন। ঔ বিঘ্ন উতার ব্যাখ্যা এসাদে দেসি।

(১) আধ্যাত্মিক বিঘ্ন : বিভিন্ন নমুনার মানসিক নুরারাপানি, অশান্তি, উদ্বেগ আদি। এবাকার সময়ে আমরাং হাবিস্ত যাম ব্যবহার অর ইংরেজী শব্দগ - ‘টেনশন’ বা উদ্বেগ। উদ্বিগ্নতা এহানৌ আধ্যাত্মিক বিঘ্ন আহান।

(২) আধিদৈবিক বিঘ্ন : বৈচাল, গুলা, ঘর-জ্বি লাগানি ইত্যাদি প্রাকৃতিক দুর্যোগ এতা আধিদৈবিক বিঘ্ন।

(৩) আধিভৌতিক বিঘ্ন : মানুহ বার অন্য জীব-জন্তুরাংত আহে পরের বিপদ ঔতা আধিভৌতিক বিঘ্ন।

এলিয়ট গিরকে তারো তার মহৎ কাব্য ‘দি রেইষ্টল্যাণ্ড’-রমা ‘শান্তিঃ, শান্তিঃ, শান্তিঃ’ উচ্চারণর মাধ্যমে মানব জীবনেস্ত তিনোহান প্রধান বিঘ্ন দুরেই করানির ইংগিতহান দেসে বুলিয়া মাতানি যাকরের।

লমৈতেগা আরাক কথা আহান যৌকরানি যাকরের উহান অইলতাই এলিয়টে ‘দি রেইষ্টল্যাণ্ড’ কাব্যহানর তৃতীয় সর্গত ইকরেসে ‘অগ্নি-বাণী’ (The Fire Sermon) প্রসংগহান। প্রসংগ এহান গিরকে আনেসেতা বৌদ্ধ-দর্শনেস্ত। গৌতম বুদ্ধই তার শিষ্যরে ‘পার্খিব ভোগ-লালসা’ বা কামনা বাসনার জ্বিগ নিবানি বা ত্যাগ দেনার পরামর্শ দেসিল

নাগরিক ক্লোদাস্ত জীবনর ভোগ-বিলাসর কদর্যতার রূপঙান ফুটেয়া তুলেসে ‘অগ্নি-বাণী’ সর্গৎ যেহানাত্ত এলিয়টে কামনা-বাসনার বিষয় এহানরে সার্বজনীন রূপ আহান দেনার হংনা করেসে। গিরকে লণ্ডন শহর এগরে বানাপেইলেও ভোগ-বিলাস মস্ত নগর এগর ভ্রষ্টাচারর প্রতি সচেতন আসিল। উহানে লণ্ডনরে মাতেসিল অবাস্তব নগর (আনরিয়্যাল সিটি)। এরে সর্গ এহানর অন্তিম পারেও উহানিত প্রাচ্য বার পাশ্চাত্যর দুগ

সিদ্ধপুরুষৰ মতামত উপস্থাপন কৰিয়া দেখুৱা দেসে তানুৰ মতৰ মিল উহান। বুদ্ধই মাতেসিল যে জন্ম-মৃত্যু বার পুনৰ্জন্মৰ গতিচক্ৰন্ত জিংতানি মনেইলে আমি কৃচ্ছ সাধনাত ব্ৰতী অয়া কামনাবাসনা ত্যাগ কৰানি লাগতই, বার ত্যাগৰ মাধ্যমে মানুৰতা নিৰ্বান লাভ কৰানি সম্ভব অইতই। বুদ্ধৰ সাদে মহাপুরুষ অগাস্তিনেউ খিয়াল কৰেসিল যে মানব জাতি এহান কামনা-বাসনাৰ জ্বিগত দন্ধ অসি। বুদ্ধৰ সাদে অগাস্তিনেউ মাতেসিল যে এৰে অংতান্ত জিংতানিৰ উপায়হান বৈরাগ্য (এসেটিসিজম) এলিয়টে তার ‘অগ্নি-বাণী’ত অগাস্তিনৰ ‘দি কন্ফেসন্স্’ গ্রন্থৰমা উল্লেখ কৰা তার অভিজ্ঞতা উহানৰে উপস্থাপন কৰেসে। অগাস্তিনে ইকৰেসে - ‘To Carthage I came, where there sang all around me in my ears a cauldron of unholy loves.’। লেৰিকহানৰ দশম খণ্ডত সেংকৰে ইকৰেসে - ‘And I... entangle my steps with these outward beauties; but Though pluckest me out, O Lord, Thou pluckest me out; because thy loving kindness is before my eyes.’। এলিয়টে ইকৰেসে -

‘To Carthage then I came

Burning burning burning burning

O Lord Thou pluckest me out

O Lord Thou pluckest

Burning’.

বুদ্ধ বার অগাস্তিনৰ চিন্তাধাৰৰ মিল উপস্থাপন কৰানিৰ চৌৱাং বার কাৰুকাৰ্যৰে প্রশংসা কৰিয়া সমালোচক Cleanth Brooks-এ মাতেসে - ‘The wisdom of the East and the West comes to the same thing on this point.’ (প্ৰাচ্য বার প্ৰতীচ্যৰ প্ৰজ্ঞা আয়া তিলসেগা আকপেইত এৰে বিষয় এহানাত)।

মৃত্যুর কবর

এপ্রিল, যাম নিষ্ঠুর মাহান, জরমদের লাইলাক
মরা-মাটি ফারিয়া। তিলকরের
নিংশিং বার খৌরাং। লরার
চামদাকা মারা বসন্ত-বরনে।
আসিলাং আমি জারহানে উময়া, গুরেসিল মালেম এহান
বিশ্মৃতি-বরফে, আসিলাং কুনোমতে
ছকানা মাবাহে খেয়া ঠই জিংতা করিয়া।
বারিবাই খাং লাগাসিল আমারে; ষ্টার্নবার্গাসীর গজেদে
বরন জুরি আহান; আমি এভেনুগত উবাসিলাং গাছর তলে
বার আগুরেয়া গেসিলাংগা হাফগাটেনে বেলির মিঙালে
কফি পিতে পিতে ঘন্টা আহান আমি দিলাং য়ারিপরি
'মি রাশিয়ানগ নাগে, লিথুনিয়ানগ, সেইস্কাং জার্মানগ।'
মি উবাকা কনাক আসিলু, আসিলু আর্চডিউক গিরকর ঘরে
জ্ঞাতির বেককগ, তা মরে স্নেজে করিয়া নিয়া গেলগা বরফব গজেদে দুরেইত
মি ডরহানে কুচসিলু। তা মাতল - 'মেরী,
মেরী, চেৎকবে ধর।' মাস্তে মাস্তে পরলাং ডপৎক তলেদে।
টেঙারাই টেঙাবাই বুলানি নুঙেই, স্বাধীন তি যেপেই
মি রাতিহান হাবি পাকরলু লেরিক বার জারর পরে গেসিলুগা দক্ষিণে

কিসাদে মারাথাং এতা মাসাচেৎ কতি? কিসাদে ডেঙ থাং ডেমর আয়া
হিলর গুরার হাদিত? হে টেইপাঙ মানুর পুতকগ,
কিস্তাউ তি মাতে নারর, উপনিও নারর
কারণ তি হারপাসত হুদা-
বাগা প্রতিমার তুমুর, যেপেইত-
বেলিহানে করের চিক চিক
মরা গাছে নাদের ঠাং
জিনজিনির রৌও নেই নুংশিহান

বার ছদ্ম ছকানা ছিল, শব্দ নেই পানির ,
 এপেই ছেয়াগ আসে এরে রাঙা হিলর টেঙারার তলে
 (আই, এরে রাঙা হিলর টেঙারার তলে)
 মি তরে দেহেইতউ নুবা আহান- যেহান
 বিয়ানকার তর পিঠির ছেয়াগউ নাগই
 নাইলে পরকার যে ছেয়াগ কাহের তরে উনাউনির সালে, উগউ নাইগে
 মি দেহাউরি তরে ডরহান মুষ্টি আহান ধুলিত, তি চা।

‘জুর জুর নুংশি বৌ

দেশেষ্ট যে আহের চেই ,

আইরীশ প্রিয়া মর

আসে তেই কুম্পেই।’

‘তি মরে দেসিলে পইলা হায়াসিহু সপা আহান, বসর আহান আগে
 হায়াসিহু নিঙলগ বুলিয়া ডাকলা তানু মরে ’
 তেবউ, আমি যেবাকা নিকুন্নাং হায়াসিহু বাগানেস্ত আয়া
 তর আত জোর করা, তিঙা চুল, মি কিস্তাউ
 নারলু টটরানি, আহিগি মামইল মর
 মি জিংতা না মরা, হাবনাপাসিলু কিস্তাউ
 মি মিঙালর ঠইগর বেদে আসিলু চেয়া, ইংচিকর বেদে
 হাবিতা ছদালা, শূন্য হাবি বারা।

সসন্দ্রীস গিধানক, নাংজাদা গণকগ
 কাহানিল য়াম হিনপাসে, তেবউ
 হাবিত্ত জ্ঞানী বেয়াপা বুলতে ইউরোপে ফিটেসে তেইর নাং।
 তেইর আতে চপ আহান জাদুকরী তাস;
 এপেইং, মাতিরী তেই
 এপেইং তর তাসহান - বুরেসিল ফিনিশীয় নাবিক
 (তার যেগি আহিগি এবাকা মুক্তা পালসে চাতা।)
 এপেইরমা বেলাদনা, টেঙারার সিজাগ
 হাবি ঘটনার সিজাগ।

অবাস্তব নগর

জারর বিয়ান আহান বাদামী খুরা আহানর তলে
 লগুন ব্রীজর গজেদে গুট গুট মানু, মেলাহান

মি না খালকরেসিলু মরণহানে উতা হাবি মানু লমকরে বেলাসে
ঠুনিংখা উতা বাঢ়ি বাঢ়ি বার ফ'ফ' করিয়া নিকুলিল
প্রতেকগ মানু নিজর জাঙহানর বেদে কুপকরে চেয়া
মানুহান টেঙারাগর গজেদে কায়া লামতারা কিং উইলিয়াম ষ্ট্রীট বেয়া
যেপেইং সেইন্ট মেরী উইলনথ গীর্জার ঘন্টিহানাং
বাজেসিল নয় বাজি।

উপেই মি চিনেসু মানু আগরে দেহিয়া ডাহৌরি চিকারিল : 'স্টেটসন' (।)

'তি নাই মর তুলো আসিলে মাইলীত জাহাজর লগর উগ?'

'ঔ যে লাশগ তুমি গাতাসিলাই গেলগা মারি তোমার বাগানে
ঔগ ইচুদিনে ডেমনি অকরেসেথাং? এমারি শতইতইথাং ফুল?'

'না তার হেজিহান খাংতা বাগেসেথাং বরফে?'

'হুনে, কুকুর ঔগ দুরেই করো, মানুর মারুপগ ঔগ,

নাইলে তার নখ ঔতাল সেংকরে গাত ঔতা খুলানি অকরতই।'

'তি মর গড়েইপা পাঠকগ, মর ইতাউ, বেয়কগ মর।'

দাবা খেলা

যে চেয়ারহানাং বহেসে তেই, জঁকজঁকা সিংহাসনহান যেমন,
ঙাল মার্বেল য়েক্কা, উপেইং মেংশেল উহান
ফলবতী দ্রাক্সালত ললকরা রুকর খুটির গজে বহাসি যতনল
ছনার কন্দর্প য়েপেইং লুমকরিয়া চার
(আরাক আগই তার পাখে মেইথং লুকার)
মেংশেলে দ্বিগুণ ঙালৈল হাত-ডেঙি মোম দণ্ড-জ্বিগ
মিঙালর জ্বলক পরের টেবিলহানর গজে
তেইব অলঙ্কার ঙালহান চুনাসিল ঔ ঙালব লগে
যেতা তেই থসিলী সাটিনর বাক্সত থাকে থাকে হাজেয়া;
আস্তির দাত বার রাঙিলা লিকলির হংকবা শিশি মুকিয়া
নিকুলের তেইব আচানক গরেইপা আতবর গং
প্রসাধন উতা, গুরা বা তরল, উটা-পিটা, বিড়ুলা সাভুলা
উতার গংহানে বুরিল ইঞ্জীয়হাবি, খিলকির বৌহানে এক্সা দিয়া
এতাই বপর বার মোমগর হাকাং কাসে জ্বিগ
উতার ধুমা লাগের আয়া দেবালেস্ত ললকরা ছাদে
ঔ ধুমাই লরা দেসিল পেনেল-য়েক্কা ছাদর নকশা হাবিতা
সুমুদ্রর বিরাট রুক হাজাসি তামালো
বাদাসি রঙীন হিলে, জ্বলকেসিল অসাংপা বার কমলা মিঙালে
ঔ বিষাদ-পহরহানাং ডলফিন আগ হাতুরের কলয়া
পুরাণা পর্দাহানর গজবারাং য়েক্কেসি
খিলকির বিতরে যেমন দেহিয়ার বনর দৃশ্যহান
নাইটিংগেলর রূপান্তরর মারি, বর্বর রাজাই যেগর,
হায় ফিলোমেল, - করেসিল বলাংকার বেসেপ কবে;
তেবউ ঔ নাইটিংগেল,
বুজাসিল মরুমামহান হারৌর খল্লিকে
কাদেসিলী তেব তেই, বার এবাকাউ ছনানি মনার এ মালেমে;
'চিক চিক' শব্দ বাজের আনিকা কানে

বার আরতাউ মিমুত যেতা কালর চিনত মাহি
 দেবালরমা য়েকরানি অসিল; মূর্তি উতার পাকদুরা আহি
 নঙেসিল, নঙের, বেড়িয়া থসি ঘর ইংচিক চিকর
 সিড়িহানাৎ ঠপ ঠপ পারার শব্দ
 জ্বিগর পহরে তেইর চুল, চিনাহানর তলে
 মেইরিকর সাদে পরের সিলয়া
 জিলকিল বাহিগি অয়া, পেইবাকে চিকৈতৈ হাবিতা বেসেপ করে।

‘আজি মর নার্ত এতা কিতা কিতা করে হাই, হবা নেই।
 থাক মর কাদাৎ। টটরা মর লগে। কিয়া তরাং মাত-বোল নেইতা
 সুপ? টটরা। তি কিহান খালকররতা? কিতার খালকরানি?
 কিতা? মি কুনোদিন দরে নারুরি তি কিহান খালকরর। খালকর।’

মি খালকরুরি আমি যেমন উদুরর গাতে
 মূতা উতাই মাংকরেসি যেপেইৎ তানুর আড়।

‘কিতার লৌ থাং উতা?’
 দুৱারর তলেদে বৌহান।
 এবাকাতে কিতার লৌগ উগ? বৌহানে করেতা কিহান?
 ‘কিতাউ নাগৈ বার কিতাউ নাগৈ।’

তিতে না হারপার থাং কিতাউ? নাদেহর থাং কিতাউ? নিংসিং নার থাং
 ‘কিতাউ?’

নিংসিং অউরি মি
 ঔরে মুক্তা উতাই অসিল তার আহি
 ‘তি জিংতায়া আসত, না কিতা? মুরগত নেই থাং কিতাউ?’
 তেব

অঃ অঃ অঃ অঃ সেক্সপীয়েবর ঔ রুমান উহান -
 কতি গুলসিল
 লৌশিং পালসিল
 ‘এবাকা কিহান করতু মি? কিহান করতু?’

মি মর সাদে নিকুলতৌ, আটতৌ পথেদে
লামকরিয়া মর চুল ইমে এসাদে। কালি আমি করতাঙাইতা কিহান?
ইচুদিন আমি কিহান করেসি?

দশটার তপ্তা পানি।

যদি বরন দেৱ, চারি বাজিত দুৱাৱ গাটা গাড়ি
বাৱ খেলতাঙাই দাবা।
আহিৱ পট না বেজতাঙাই
বাসেইতাঙাই কুনোগই দুৱাৱে আয়া ঠুকেইতাই উহান।

যেবাকা লিলব হেয়ক নিকুলিল ফৌজৱ চাকুরি বেলেয়া,
মাংলু মি -

সুপ না লুকেয়া, মি নিজে মাংলু তেইরাং-

‘ত্বরা কৱ, এবাকাই সময়হান’

এবাকা আলবাট আহেৱ আলয়া। তি খানি স্মাৰ্ট অনা তালকৱ।

তা হাৱপানি মনেইতই ঔ ৰূপাল তি কিহান কৱলেতা?

দাত বান্দানিবকা যে দেসিল ৰূপা। মৱ মুংহানাং

দাতগি হাবি লাগা বেলা লিল, নুৱা আকসুৱি লাগেইস।

তা মাংল - সেত্যহে, তৱ মেইথংহান সুপ চা’ নাৱুৱি।

নাৱুৱিতা মিয়ৌ, মি মাতেসিলু, চা হেবানিয়া আলবাটৱ দিক উহানৌ।

চারি বসৱ হাবি আসিল ফৌজে। এবাকা মনেইতই ফুৰ্তি কৱানি।

তি যদি নাদুৱী উহান, দেকুৱা আসি অন্যতা। মি মাংলু.

অ আসিতা? আংকবল তেই. মাংলু - ইমে উসাদে আহান।

উতাইলেতে হাবপেইতৌ থাকাং দেনা কাৱে থকৈবতা? মাংল তেই আকফিৱ
চাতা মৱে ইজ্জুম কৱে।

‘ত্বরা কৱ, সময়হান অইল।’

এহান যদিঔ ঠিকনাপাৱ, এহানল চালেয়া যানা পাৱুৱী। মি বুজ আহান দিলু।

তি যদি নাৱুৱী, হাৱপেইস, অন্যতাউ দেকুৱী আসি।

আলবাটে ধাবদুৱাৱ যদি, তি না বুজ্লেউ ধাবদুৱেইতই।

তৱ তাতে লাজ কিতা নেই থাং? মি মাতুৱি - এমনো বুড়ীগ অসত।

(অথচ তেইৱ বয়স হবে আককুড়ি এগাৱো)

মি কিহান কৱতু মাং? - মিথংহান মিমুং কৱিয়া মাংল।

সৌ বাগানিরকা যে গিলেসিলু হজকর পিল, উতার সালে, মাংল ভেই
(পাচখুরুম অয়া সৌ, ছরকাং জর্জর সালে মরন ফাঙসিলী।)
মেইপাগই কথা দেসিল ঠিক অইতই হাবিতা। মি কিন্তু নারলু
আগর সাদে অনা।

তি আপাংপীগহে - মি মাংলু।

যেতাউ অক, আলবার্টে যদি না এরদের তরে আকখুলিগ করে, মি মাতুরি,
উবাকা নারতেই

বিয়ার মানেহান কিহান, সৌ যদি নাচাউরি তি।

‘ত্বরা কর। সময়হান অইল।’

‘ত্বরা কর। সময়হান অইল।’

বিদায় তরে বিল। বিদায় লু। বিদায় মে, বিদায়। বিদায়। বিদায়।

মিংগা উতা। বিদায়। বিদায়।

বিদায় সিঙ্গাগাহি। নুংশিপী নিঙল, বেয়াপা। আহিংগা। আহিংগা।

অগ্নি-বাণী

সরাহানর তাম্বুগ কল্লি কল্লি, পাতার লম্বেলগা হিরগ পেয়া
চেৎক ধরিয়া থানার কানানেই হম্মার পিছেদে জাবুরেসে তিঙারা লেঙৌর তলে।
তারো, বৌহান বাদামী লামহানব গজেদে ইংচিকে বহে য়ারগা। পরী হাবি
গেসিগা বেলেয়া।

হে নুংশিপী টেম্‌স্‌, বহে য়াগা তাপকবে, লম্‌ নাসে এলাহান মব।
সরাহানে বয়া নানের আর খালি বইতল, স্যাণ্ডউইচর চৌঙা,
রেশমী রুম্মাল, রুকর বাক্স, সিগারেটর টুমা
অথবা গরম রাতির অন্য চিনত মাহি পরী হাবি
গেসিগা বেলেয়া।

তানুর মারুপ মাসাং, নগর পালর টৌ-এরে দিয়া বুলুরা জিপুত
গেসিগাতা হাবিহান, নাথসি কুনো ঋংকুল।
লেমানর পানিহানর কাদাত বহেসুতা মি, কাদলু অনেক—
হে নুংশিপী টেম্‌স্‌ বহে য়াগা তাপকরে, লম্‌নাসে এলাহান মর।
হে নুংশিপী টেম্‌স্‌, বহে য়াগা তাপকবে, নেমকরা খল্লিক মর, বাউ য়ারপরি।

উদুর আগ গাছর তলে গেলগা সুরুৎক বেলেয়া
থলক থলক পেটগ তার লেঙৌ এদে আসুলে আসুলে
ঔবাকা মি আনুরাহানাং বহেসিলু মাছ ধরিয়া
জাবর সেন্দাকার পর আহান, গ্যাস ঘরর পিঠিত, খালকরুরি -
বুরেসিল জাহাজ ঔগ - রাজা ঔগ - মর বেয়ক খুন্না ঔগর কথা
বার ঔ রাজাগিরির - মর বাপক - বেয়ক ঔগ তার আগে মরানির পৌ।
চেপচেপা মাটির গজে থনা অসিল চামদাকা নথ দেহাগি
বার আড় ঔতা ছরকাং কোঠাসৌ আগত থনা অসিল বেলেয়া
উদুরর ঠেং লাগিল, ঠং ঠং, বসর বসর।
মর পিঠিত মি কিন্তু ছনুরি হাদি হাদিত
মটর বার হর্ণর শব্দ, যে শব্দর সালে
শ্রীমতি পটারে লগ পেইরী সুইনীরে বসন্তর অনুরাগে।

জোনাকহান ঙালয়া সিলর শ্রীমতি পট্টার বার
 তেইর জিলকরাং।
 তানু জাঙ খইতারা সোডার পানিল
 'ওঁরে সৌর নারে এলাহান কোরাস খল্লিকে।'
 খুট্ খুট্ খুট্ খুট্ খুট্ খুট্
 চিক্ চিক্ চিক্ চিক্ চিক্ চিক্
 বলাৎকার অসিল
 টেরেয়ুস।

অবাস্তব নগর

বাদামী খুৱার হাদিত জারর বেলিটিকহান
 সিরিয়ার মহাজন ইউজেনিদিস গিরক,
 নাখুরা দাড়ি, খৌহাবি বুজেসে হকানা কিশমিশে
 পথ পরিবহনর বীমা লগুন পেয়া দিয়া হদাসে; দলিল হাবি সেং
 বাজারী ফরাসী ঠারে বার্তন জানেইল তা
 মরে বারোবাজির লাঞ্চে ক্যানন টুটিট হোটেলর রুমে
 উতার পিছে হাপ্তাহান লমনির হারৌএ মেট্রোপলিত।

বাদামী খেলতামহানাং আহি বার পিঠি
 বুলন দেৱ গজেদে ডেস্কেস্ত, যেবাকা মানব-ইঞ্জিন বাসেয়া থাৱ
 বাসাকুরা ট্যাক্সির সাদে বট্ বট্ বট্ বট্
 মি তেইরেসিয়াস, অঙ্ক যদিও, দুহান জীবনর হাদিত নিংখা বাগুরি,
 খচ খচ নারীস্তনল মি বুড়া মুনি আগ, মি দেহুরি
 ঘরর বেদে সালর মন গোধুলীং বেগুনী খেলতামে
 বার সুমুদ্রন্ত আলথক অর নাবিক ঘরর বেদে
 টাইপিষ্ট ঔগ আইরী ঘরে চা পিনার সময়, হদেইবীতা প্রাতঃরাশ,
 লাগেইরীতা স্টোভ, বার টিন উতাত খেইল বস্ত্র খইরীতা বুজিয়া।
 খিড়কীহানর বারাহানাং সরা দেসে ফুতি-ফালি বেশেপ অংতাং
 হকা দেৱ দিনহানর লমইলগা রইদহানে।
 ডিভানর গজে থইরী ফুতির তুম্বুর (ওঁ ডিভান ঔগই রাতিকার হেজিহান)
 মুজা, সেণ্ডেল, অন্তর্বাস বার বডিস।
 মি তেইরেসিয়াস, খচখচা বাটর বুড়া মানুগ
 উপহিলু দৃশ্য উহান, বার মাতেসিলু ভবিষ্যৎ কিহান—

বাসেয়া আসিলু মিঙ খৌরাঙল অতিথ উগরে।
তা, জটুল আলা যুবক আগ, আহিল
হুয়া ঘর-দালাল আগর কেবাগীগ, দৃষ্টিহান কুপ,
তলর থাকর মানুগ অয়াউ যাম আত্মবিশ্বাসী
বেডফোর্ডর বেশমী টুপীর কোটিপতি মানুর সাদানে
জবর হবা খেলতামহান এহান, মিলেয়া তা চার
লমকরল তেই খেয়া, ঠুकरা গারিগ তেইর অলাং আহানাং
গিরকে করের হুনা যরক তেয়ৌ বানানুংশি-চুমাং
নামনেইরী যেহান তেই, নামনেইরী সুপ সেচিয়া থানাও।
হারৌর ঙালে লেপয়া তা থেঙর বলাংকাবে
মুক্‌দা-মুক্‌দি নেই আতে, নেই কুনো বাধা
তাৰ মুনিথকপাহানে বার নাবিসারার কুনো প্রতিক্রিয়া,
উদাসীন তেই, তেৰ তাতে বার হাবৌ হাবৌ।
(বার এরে মি যে তেইরেসিয়াস নাঙসু আগেদে এহান
এরে ডিভান এগব বা হেজি এহানাং লমসিল কাম এহান,
বহেসিলু খীবেস নগরর দেবালর তলে
আটেসিলু মৃতার হাদিত অধমেত্ত অধম উতার বিতরে।)
লমৈলগা চুমাহান দিল নুংশি আবেগে
উতার পিছে চুমচেং সিড়িয়েদে আখাবহানাং পথ হাতারেয়া...

বুলন দিৰী গিথানক ঙাহাক আহান মেংশেলহান চেয়া
হুশ সুপ নেয়সেতা প্রেমিক উগ গেলগা কুস্বাকা,
মুরর বিতরে বুলের হেইরাপ খালকরানি আহান
'জিংতাইলু, লমৈল কামহান; লমৈল হান্তে হাবৌ অইলু মি'
সাদ হবা নিঙলে যেবাকা নাগৈ কামে লামে পরতারা
ঘবর বিতরে তেই, আকখুলীগ, আটরীতা বারে বারে কিহান মনেয়া
যন্তুহানর সাদে আত - চুল উতাৰ বেণী বলিৰী,
রেকর্ড আহান লাগেইলগা গ্রামাফোন মেচিনহানাং।

'পানির গজেদে আহেসিল এলাহান মরে বেয়া',
বার ষ্ট্যাণ্ড এন্ড ইজ্জু অয়া রাণী ভিক্টোরিয়া সড়কগ পেয়া
হে নগর নগর; হুনি মি হাদিৎ
লামার টেম্‌স্‌ ষ্ট্রীটর সরাইখানার কাদাকাদিৎ

মেগুলীনর নুংশি সুর, কঙালা খল্লিক
উতার হাদিত বার ঠুংঠাং, আবিজাবি য়ারি
যেবাকা মাছুরাই জিরেইতারা বাববাজির পবে;
যেপেইং জ্বলকার কতি
আয়নীয় দলা বার হুনাই বেড়া মেগনাসর শহীদ-স্মৃতি-বাল।

সবাহান ঘামের
থৌ বার আলকাতরা
নৌগি ছুটের
মুজুরা জোরারে
রাঙা রাঙা পাল
সালয়া পরের
উজান বৌং লড়ের বরি মাস্তুল
নৌগ ধরো
রুকগি বাহের
গ্রীনিচব কৈঠেক লালয়া গিয়া
কুকুর দ্বীপগ পিঠিত বেলেয়া
হেইয়া হো হেইয়া হো
হেইয়া হো হেইয়া হো

এলিজাবেথ বার লাইসেণ্টার
বেইতারি কেরালিহান
হালহানর দিক দেহা যারগা
হুনাং বেড়াসি হামুক
রাঙা বসন্ত
পানিহান ফুলের
দ্বিয়বারার পার সুপা টৌএ
বৌহান কা'হের দক্ষিণ-পশ্চিমে
টৌতে লামের ভাটার আসুলে
ঘন্টার রৌ
ধলগিরা কনুঙ
হেইয়া হো, হেইয়া হো
হেইয়া হো, হেইয়া হো

‘ট্রাম বার ধূলি-উটা গাছ
হাইবারিয়ে বিকাটা আহান করল মরে, রিচমণ্ড বার কিউ
করে দিলা মর সর্বনাশ। রিচমাণ্ডরাং তুঙ্গু মর আঠুগি
হরকাং নৌগর ডামহানাং একেবারে চিং।’

‘মর জাঙহানি মুরগেটে, বার রিদিগ
মর জাঙহানির তলে। ঘটনাহান অনার পিছেদে
তা কাদল। তা সাগী করল - “নুরা জনম আহানর ”
মি কিত্তাউ নামাতেসু। কিত্তার দুঃখ মরাং?’

“মার্গেটে লেঙৌর গজে
সামদানি পারুবি মি
কিত্তাউ নেই উতার লগে কিত্তাউ নেই উতার।
আনিকা আতর বাগা টুমা টুমা আঙুলির নখ।
মোর মানু ঐতা লেইরা মামুলি মানু, খৌবাং বুলিলতা নেই তানুরাং
কিত্তাউ।”

হো হো
কার্থেজে আইলু উতার পিসেদে
পুরতে পুবতে পুরতে পুবতে
মোরে নিকালেয়া নেগা প্রভু
হে প্রবু উদ্ধার করনে মোরে

পুরতে পুবতে

সলিল-সমাধি

ফিনিসীয় ফ্লোবাস, দ্বি-হাশ্টা আগে তা দ্যৌ অইল;
পাছরেসে চিনুনির ডাক, লু সমুদ্রর ফেনাৎ জোরারর রৌ,
লাভ বারো ক্ষতি।

সমুদ্রর তলেদে ছৎগ
তার আড় নেসেগা চরেদে। বাহিতে বাহিতে বুরতে বুরতে
তা তার বুজন বারো কনাকর পালাহান লালয়া গিয়া
হমাসেগা হতর বুলুনির হাদিৎ।

হবাগ, না ইহুদিগ
অয়া থাক য়েগউ
হে গিরক, তি য়েগই বুলার চাক্কা বৌহানর বেদে থিয়াল থ,
চেইস ফ্লোবাসরে, আকদিন রূপে-গুণে ডাঙরে ডীগলে
তোর তুলো তাউ মানড্ অসিল।

বজ্র-খল্লিক

স্বামে-তিঙা মেইথঙে ডেউটির রাঙা পোহরহান, উতার পিসে
বাগানহানাং তুসার ইংচিক, উতার পিসে
কাদানির জুরণ, বারো চিকারি
কারাগার, কন্নুঙ বারো প্রতিধ্বনি
বসন্তর বজ্র-খল্লিক দুরেইর টেঙারাং
জিংতাসিল য়েগ, আজি মৃত্তা
আমি, যেতা জিংতাসিলাং, আজি মরানির অংতাং
শৈর্যাহান লগে খানি থয়া

এপেই হুদালা হিল, পানি নেই সুপ
হুদা হিল, নেই পানি বার লেঙৌর পথ
টেঙারাই টেঙারাই পথ বাগিয়া কৈঠেক
হিলর টেঙারা এতা পানি নেই, নেই পানি
যদিরে থাইলইস পানি, আমি খাময়া পিলাঙইস
হিলর হাদিত নুরারের কুনগৌ খামনি বার খালকরানি
হুকেসে গারির ঘাম, লেঙৌত জাবুরা জাঙ
যদিচৈ এপেই থাইলইস হুদা পানি হিলর হাদিৎ
এ মবা টেঙারার পকাবা দাতর থতাং নেই সেপচানিঙ
এপেই কুনগৌ নারের উবানি, খানি টিংদানি অথবা বহানি
এরে টেঙাবার হাদিত এমনো কি নেই নীববতা পেয়া
হুদা হুকালা বাঞ্জিবা বজ্রর রৌ, বরনতে নেই
নির্জনতা, উতাউ নেই এরে টেঙারার হাদিৎ
জুদা দুঃখিপা রাঙা মেইথঙ যেতার আলিপা মিল্লেঙ বার কুকুরর লৌ-
ফাটারা মাটির ঘর উতার দুরারে উবায়া
থাইলইস যদি পানি এপেই

নেই কোনো হিল
 যদিচৈ থাইলইস হিল
 বার লগে পানি
 হুদা পানি
 লক
 হিলর হাদিৎ তুরার
 পানির শব্দ
 জিনজিনি
 বার হুকানা ঘাসর এলা নাইগে
 হিলর গজে হুদা পানির শব্দ
 য়েপেই নুংকুপী আগর এলা পাইন গাছর আগাৎ
 টিপ টপ টিপ টপ টপ টপ টপ টপ
 ফুটাহানৌ কিন্তুমান নেই এপেইৎ পানি।

কুংগ ঔগ তৃতীয়গ তর কাদাৎ আটিয়া থার য়েবাকাউ?
 য়েবাকা লেহাউরি মি, দেহুরিতা আকসাটে তরে বার মরে
 কিন্তুমান য়েবাকা চাউরি মি মুঙবারার উচ দলা পথগদে
 দেহুরি আরাক আগ য়েবাকাউ বুলেব তর কাদাবারাদে
 বাদামী আচালাই গুরা মিথংহান কার
 হারনেই, মুনিগ? না জেলাগ থাং ঔগ?
 কিন্তু কুংগ থাং ঔগ, য়েগ আসে তর হেরৌবারাদে?

হাকহানার উচ বৌএ কিতার শব্দহান?
 বেয়াপা-খল্লিকে য়েমন নুংকুপী জুরন
 গারিয়ে মুরে গুরেসি ঔতা কিতার গুটহান?
 লৌটাক লপুক বেয়া সালসিতা ফাটা মাটিত উষ্টা খেয়া খেয়া
 বেড়ি দেসে হুদা সাল দিগন্ত রেখাই
 টেঙারার গজে ঔরে কিসাদে নগর?
 বাদামী বৌরর হাদিত ফাটের, হঙর বার কুর্গা কুর্গা অর
 পরে য়ারগা দলান
 জেরুজালেম, এথেন্স বার আলেকজান্দ্রিয়া
 ভিয়েনা, লণ্ডন

জেলা আগই তেইর ডিগল কালাচুল টিংদিয়া বাদেসিলী
 ঔ চুলর তারর গজে বাজেইরীতা বেহালার নেমকরা সংগীত
 সেকপী এতা সৌর সাকতাৎ বাদামী পহরে
 ছরঙ্গী বেইতারার বার থাপারতার পাখ
 মুর নঙেয়া আম্পুরিল লামেসিলা কালা ঝাল আগর তলে
 বার বৌহানাৎ দলান মাহি উল্টেসিল ফর্দে ফর্দে বিশ্বুলা খেয়া
 বাজেসিল পুরাণা ঘন্টা সময় বাগেয়া
 বার এলার খল্লিক মাহি নিকুলিল খালি টেংকি বার ইদারাস্তকুরি।

উচ টেঙারার হাদিৎ টুণ্ডা সুরুঙে
 জোনাকর মিমৎ ঙালে এলা ঘাসর
 ঝাঙ্গা কবরর গজে গীর্জাগর কাদাৎ
 ছদালা গীর্জাগ উপেইৎ নেয়সে কিস্তাউ, বৌহানে পাতেসে জিনা
 নেয়সে খিলকি উপেইৎ নেয়সে কিস্তাউ, বৌহানে পাতেসে জিনা
 নেয়সে খিলকিও তার দুৱার উতা লড়ক খড়ক
 ছকানা আড় মাহি কার কাজেও নাগই ক্ষতিকর।
 মুরুক আগ বহেসিল ছাদহানর গজে
 কুকুর কুক, কুকুর কুক
 জ্বলকেসিল বিদ্যুতর তলে। উতার পিছে বৌ আহান
 লংলেই বাগিয়া
 পরিল বরন জুরি

গঙ্গাহান পাহেসিল, কুচ কুচ পাতা
 বাসেইলা বরন, যেবাকা কালা মেঘ
 পুলইল দুরেইৎ, হিমবস্তুর গজে।
 বনহান নঙিল, কুচৈল ইংচিকে
 উবাকা টটরল বজ্রহানে

দ

দস্ত : আমি দেসিতা কিহান?

হে ইতাউ, রকতে নিকদুবার মর রিদি
মেত্তমকার কাৎকরানিৎ আচানক বলিহান
সময়র বুজহানে যেহান আলকরে নারের
এহানেই, হুদা এহানর সালে, আমি জিংতায়া আসি
নাপেইতাঙাই যেহান আমার কুনো স্মরণসভাৎ
নাইলে কুনো দয়াবান মাকরে বুনা নিংশিঙর জালে
নাইলে কুনো চক অধিবক্তাই বাগের শিলমোহরর তলে
আমার হুদালা ঘরে

দ

দয়ধ্বম্ : ছনোসিলু চাবির শব্দ

দুবার হানাৎ বুলিল আখুম বার বুলিল হুদা
আখুম

চাবির কথা খালকরিয়ার আমি, প্রত্যেকেই বন্দী নিজর কয়েদে
চাবির যারি খালকরিয়া প্রত্যেকেই হংকরিয়ার কয়েদখানা
রাতিহান ছেয়া আইলে হাগেদে রটের পৌ
ঙাহাক আহান উবার বিধ্বস্ত কেরিওলেনাস

দ

দাম্যত : নৌ উগ লড়েসিল

হারৌহানে, জান্তেকুরা আতহানিয়ে পালতুলিয়া বেইলা কেরালি
সুমুদ্রুহান ইংচিক চিকসিল, তর রিদিগউ নাসলইস
হারৌহানে, বার্তন পেইলে, একান্ত অনুগত অয়া
চালাকুরার আতর ইশারাত

মি বহেসিলু পারগত
ধরেসিলু মাছ, বার মর পিঠিত কু-পরা লামহান
মর লাম এহান পারতৌ থাং হংকরানি?
লগুন ব্রীজহান বাগিয়া পরের বাগিয়া পরের বাগিয়া পরের
'মর লাংলা উহান নিংশিং আই'
'মর এলা নাহ্নতারা কুনোগই - হে 'খাটলপাকক', 'খাটলপাকক'
'বাগা কমুঙে বন্দী রাজকুমার একুইতাল'
এ টুকারা এহানি কাকরে দিলু পারগত, হাবি মর ধ্বংসর আতেন্ত
এহানি তুমার সালে থ দিতৌ। সেংক হায়রোনিমো আইল পাগল।
দন্ত, দয়ধ্বম, দাম্যত।
শান্তিঃ, শান্তিঃ, শান্তিঃ





দিলীপ কন্দুসিংহ

বিংশ শতিকাৰ বহুচৰ্চিত কাব্যগ্রন্থ আহানৰ নাংহান টি. এস. এলিয়টৰ ‘দি বেইষ্টল্যান্ড’। ইংৰাজী সাহিত্যৰ বিশ্বব্যাপী চৌহিদাগ হাপদানিৰ গজেউ এ মালেমৰ নানান উন্নত বার অনুন্নত ঠাৰে এ লেৰিক এহানৰ অনুবাদ, এহানৰেল বিতৰ্ক বার আলোচনাৰ অন্ত নেই। ৪০৩-হান পাৰেঙে পুন্নাপ পৰিকল্পনাৰ মাতুঙে আধুনিক মহাকাব্য আহান লেংকরানি এহান আধুনিক কাব্য-জিজ্ঞাসাৰ ফসলহান। প্রখ্যাত কবি, সমালোচক এজরা পাউণ্ডে (Ezra Pound) মাতেসে- “Eliot’s Waste Land is I think the justification of the ‘movement,’ of our modern experiment, since 1900,” সমালোচক Pericles Lewis-ৰ মতে - “The Waste Land made use of allusion, quotation (in several languages), a variety of verse forms, and a collage of poetic fragments to create the sense of speaking for an entire culture in crisis; it was quickly accepted as the essential statement of that crisis and the epitome of a modernist poem.”

আধুনিক কবিতাৰ পাঠক আগৰতা কাব্যগ্রন্থ এহান অবশ্যই পাকরানি থকইতই।